

Storianan di un mucha di Lagoen



STA. CRUZ -- Storianan di un mucha di Lagoen” – Clyde Harms Como estudiante na Julianaschool, Clyde Harms y algun amigo a funda e corant DePoort. Suprome asignacion como reportero tabata pa entrevista e musico Ruso cu Arubaanse Kunstkring a trece Aruba pa bin duna un recital na Sociedad Bolivariana cu su “theremin”, un instrumento musical electronico. De Poort a sali dos bes prome cu el a muri, pero Clyde su amor pa skirbi a persevera. Entre 2001 y 2006, ‘Brother’ Clyde a skirbi, redacta y publica na Ingles, The Trestleboard, e corant interno di logia El Sol Naciente. Den e ultimo añanan, Clyde Harms a publica mas cu cien articulo riba un variedad grandi di topico den corantnan local, na Papiamentu y na Ingles. A reedita por lo menos tres di nan den diferente revista aki na Aruba y na Hulanda. Pa Cruz Cora(Aruba) y Aruba Scholarship Foundation, Clyde a skirbi un otro cien pa dos shen relato pa prensa riba tur faceta di e fundacionnan. Cu asistencia di Don Juan Perez y Efraim “Boei” Brion (d.f.m.), Clyde a skirbi Historia di Baseball di Aruba- E prome Añanan. Na 2002 a publica e buki pa conmemora e di 50 aniversario di Aruba su participacion den e di XIII Serie Mundial di Baseball Amateur na Havana, Cuba. E Storianan di un mucha di Lagoen ta un compilacion di articulonan cu Clyde a skirbi entre 2009 y 2011. Un otro serie di articulo di e autor, recordando e añanan cu el a biba na Libya, a hala masha atencion y probablemente lo

compila nan den un buki na 2013. Clyde su plannan pa futuro ta inclui skirbi por lo menos un articulo pa luna y un otro buki pa 2014. Clyde ta duna credito na Ito Tromp y Etley Lasten pa su desaroyo di skirbimento na Papiamentu. Segun Clyde, e satisfaccion mas grandi p’e como autor, ta e momentonan cu hendenan cu e ni sikiera conoce ta par’e den un tienda of riba caya pa elogi’e pa un articulo cu nan a caba di lesa den corant. E desapunto grandi ta cu ta asina poco hende ta lesa corant. Clyde ta president di Aruba Scholarship Foundation desde su fundacion na 1987. Na 2003 Clyde a ricibi e condecoracion Ridder in de Orde van Oranje Nassau pa su obranan social. Hopi hende a yega di puntra Clyde: Pakico e hendenan cu a lanta na Lagoen ta asina orguyoso di nan barrio? Ta parce cu ora nan papia di nan tempo na Lagoen, nan ta papia di shelo mes. Clyde su contesta semper ta: ‘Mi no sa’. Pa Clyde tabata un tempo cu e ta corda cu alegria, pasobra tabata tempo di inocencia, di su formacion y di felicidad. E ta sigur cu abo como lesado, lo husga pa bo mes cu nos no ta pretencioso; ta di berdad Lagoen tabata un sucursal di shelo pa e muchanan cu a lanta den e barrio aki. Diasabra dia 11 di Mei 2013, Clyde Harms lo ta presente na Van Dorp Book & Office na Dakota pa presenta y firma su buki nobo pa esnan interesa. Pues Clyde lo ta na Van Dorp foi 11.00 a.m. te cu 1.00 p.m. Pasa libremente serca nos na Van dorp y combersa un rato cu Clyde.